

Santiago

Santiago Israe masare macari waharinare joarocaha

1 1 Yũhũ, Santiago ahri pũi mũsare noa duti joarocai nija. Cohamacũre, mari pũhtoro Jesucristo cũhũre dahra cohtariro tjija yũhũ. ˆ Jicũ Israe masa ya curuari macainare doce curuari macainare Jesu yainare macari waharinare yũ coyea mũsare joarocai nija.

Cohamacũ sehe noano masichũ yoara

2 Yũ coyea, payũ jahca mũsa ñano yũhdũhti. ˆ ñano yũhdũna noano wahchea mehne tũhotuga. 3 ˆ ñano yũhdũna, potocãta Jesure mũsa wacũ tuaare ñona ninahca mũsa. ˆ jina ñano yũhdũpanahta Jesure mũsa noano wacũ tuaina jina, tirore wacũ tua namoina wahanahca. ˆ wahana mũsa ñano yũhdũare cũno pjanahca. 4 ˆ yoana duhuro marieno ˆ cũno pjarucuina jiga mũsa, tũho masiina, Cohamacũ cahmaare noano masiina mũsa jihto sehe. ˆ jina dũhsaro marieno to yare yoarucuina jinahca mũsa.

5 Cohamacũ dũhsaro marieno jipihtinare wara. ˆ waro tirore siniinare soro nino marieno wara tiro. To ˆ jiro jichũ masina, mũsa masihti dũhsachũ tũhotuna, tirore siniga. Mũsa ˆ sinichũ mũsare masi namochũ yoarohca tiro. 6 ˆ sinina Cohamacũre noano wacũ tuatjĩhna siniga mũsa. “Sã sinichũ Cohamacũ waeraboca sãre”, ni tũhotuena tjiga. Tó sehe ni tũhotuina pjiri ma macaa pahcõri yoaro sehe jira. Pahcõri ti sũroca cohtotaro seheta tina cũhũ ti wacũapũre sũroca cohtotara. Cũno potori yoerara tina. ˆ jia Cohamacũre wacũ tuaerara. 7 Tó sehe ni tũhotuinare ti sinipachũta ne mahanocã ti siniare tinare wasi mari pũhtoro Cohamacũ. 8 Michare ahrire cahmariro jiparota ñamichacapũre soro tũhotura tjoa. ˆ yoarirore tó wahaerara.

9 Jesu yainare wiho jĩinare Cohamacũ sehe pũhtoa sõnohca. To ˆ yoahina jia wahchejaro tina. 10 ˆ jia Jesu yaina pache pũa jia ti ya pache pihtihore masia wahchejaro. Tĩ pache wiho warota jira, Cohamacũ to ñũchũ. Cohori ti dõi

baa boraah waharo seheta tí pache pihtia wahaahca. Ñ jia tina cūhū wahchejaro. **11** Sū mūja taro to tuaro sichū tja sehe ñaia wahara. Ñ yoa cohorī cūhū ñai boraah waha, noaah cohorī ti jia cjiri pihtia wahara. Ñta waharohca pache pūare ti pachere ti na cahmachuno watoi. Tina ti pache mehmeta butia wahaahca.

Ñano yoa dutiare yoerariro wahcheriro jira

12 Ñano yūhdūriro cūno pjaro, ñano yoa dutiare yoeraro wahcheriro jirohca. To ã cūno pjachū, to ñaare yoerachū jipihtia dachoripe mūano macaa catiare tirore warohca Cohamacū. “Tí catiare waihca”, ni cūa tiri jire Cohamacū jipihtina tirore cahīinare. **13** Mūsare ti ñano yoa dutichū “Cohamacū yūhūre ñano yoa dutiro nina”, ni tūhotuena tjiga. Ñano yoaare tūhotuerariro jira Cohamacū. Ñ jiro tiro sehe masare ñano yoa dutiro jierara. **14** Masa tuaro ñaare ti goa pjaata títa tinare ñano yoachū yoara. **15** Ñ jia ñaare goa pjara masa. Ñ goa pjaa, tí sehēre tūhotura. Ñ tūhotua, tí ñaare yoarucura tina. Ti ã yoarucuri buhiri Cohamacū tinare pichacapū cohānohca.

16 Ñ jina yū coyēa yū cahīina, “Cohamacū yūhūre to dutichū ñano yoahi”, ni tūhotuena tjiga. Potocā jierara tí. **17** Cohamacū mūano macariro marine noaah dihtare wara. Tiro pinihta sū dacho macarirore, ñami macarirore, ñahpichoha poca cūhūre bajuamehneriro jiro, tiro sehe to jiriro seheta ã jirucunocahna. Ne cohtotaerara. **18** To cahmariro seheta tiro noaah buheah mehne marine to pohna wahachū yoare. Ñ yoare tiro to pohna ji mūhtaina mari jihto sehe.

Potocāta Cohamacūre ño payoa ñ sehe jira

19 Yū cahīina, yū coyēa ahrire noano tūhoga mūsa. Cohamacū yare noano tūhoga mūsa. Ñ tūhona, noano tūhoturo marieno durucuena tjiga. Ñ yoa suaena tjiga. **20** Cūiro suariro jiro, Cohamacū to cahmano seheta quihōno yoariro jierara. **21** Ñ jina jipihtia mūsa ñaah yoarire, mūsa ñaare goa pjarire duhuga mūsa. Ñ jina Cohamacūre noano yūhtiina jina to buheare tuaro cahmaga mūsa. To ya buheare mūsa tuaro cahmachū Cohamacū sehe mūsare pichacapū wahaborinare yūhdūchū yoarohca.

22 To yare tūhōpanahta to nino sehe yoerana mahñōare tūhotuna nica mūsa. “To nino sehe yū yoerachū noanohca”,

ni tũhotuna mahũoare tũhotuna nica mũsa. ˆ Jina to yare tũhona tí sehere yoaga. 23 Cohamacũ yare tũhopanahta, to nino sehe yoerana, to wũhdũare ñóno mehne ñũriro yoaro seheta jira mũsa. 24 Tiro to wũhdũare to ñũri baharo waha, to ñũrire boa wahara. 25 Pairo sehe to ñũrire to boerariro seheta Cristo to dutirire tũhoro tíre yoaro, wahcheriro jirohca. Tí dutia Cristo to cahĩa mehne masare to yũhdũchũ yoahti buhea jira. Tí buheare ne cohãerariro wahcheriro jirohca. Tiro pinihta to tũhorire yoariro jira. ˆ Yoarirore noano yoarohca Cohamacũ.

26 Cãiro to ˆ durucumacancarire duhu masieraro, potocãta Cohamacũre ño payoerara. “Cohamacũre noano ño payoja”, ni tũhoturiro jiparota mahũoare tũhotura tiro. “Cohamacũre ño payoja”, niriro to jipachũta to ño payoa ne yaba cjihti jierara. 27 Potocãta Cohamacũre mari Pũcũre mari ño payona, to cahmano seheta ño payona, ˆ sehe yoaja mari: Pũcũsuma marieinare, wapewahya numia cũhũre ñano ti yũhdũchũ ñana, tinare yoadohoja mari. ˆ Jina ahri yahpa macaina ñaare ti yoaa barore ne yoa duaeraja mari. ˆ yoana potocãta Cohamacũre ño payoina jija mari.

Masare cũno potori noano yoaro cahmana marine

2 1 Yũ coyea, noa yũhdũarirore Jesucristore mari pũhtoro tũhona, tirore wacũ tuaina jira mũsa. ˆ wacũ tuaina jina masare cũno potori noano yoaro cahmana mũsare. 2-3 ˆ yoa uru sororire, wamomaca sãa sororire cjuariro, wapa tia suhtire sãariro mũsa Jesu yaina cahmachuno cahapũ to tachũ ñana tirore noano mehne piti bocaboca. “ˆi dujiro jira”, niboca mũsa tirore. ˆ nipanahta tí pjata pjacũoriro cũhũ ñano suhti tiriro mũsa cahai to tachũ ñana tiro sehere noano piti bocaeraboca. “ˆi ducuga. O yahpai dujiga”, niboca mũsa tirore. 4 Mũsa ˆ yoana masare cũno potori yoerana nica mũsa. ˆ yoana ñaare tũhotuina masare beseina yoaro sehe jina nica mũsa. “Ahriro sehe noariro jira. Ahriro ñariro jira”, ni besemana mũsa.

5 Yũ coyea, yũ cahĩina, yũhũre tũhoga. Payũ pjacũoina sehere Cohamacũre noano wacũ tuahtina cjihtire, pũhtoro to sũho jiropũre jihtina cjihtire besea tiri jire Cohamacũ. “Tóprẽ wahanahca mũsa”, ni cũa tiri jire Cohamacũ tirore cahĩinare. 6 Tinare to ˆ besepachũta mũsa sehe pjacũoinare noano yoerare. Pache pũa sehe mũsare ñano yoara. ˆ yoaa tina masare beseriro cahapũ mũsare naahna mũsare yahusãa taa.

7 Músa sehe “Cristo yaina”, masa ti niina jira. Payu pache pua sehe Cristore ñano ni durucuina jira. (Å jiro pjasuoinare mûsa ño payoriro yũdoro pache puare mûsa ño payochu sehere ñaa nina.)

8 Cohamacu dutia mehne macaa dutiare paye dutia bui curero jia dutiare õ sehe ni joaa tiri jire: “Mu basi mu cahño sehetu mu cahai jiina cũhure cahĩga”, nina Cohamacu dutia. Ahri dutiare yoana, noaare yoara mûsa. 9 Wiho mejeta masare cũno potori yoerana ñano yoana nina mûsa. Å jina Cohamacu dutiare yũhdũrucaina jira mûsa. Åta nina Cohamacu yare ti joari pũi. 10 Cohamacu dutiare yoaina jipanahta cũnotare mûsa yoerachu paye dutiare mûsa yoa pahũopachuta yaba cjihti jierara. Ñaa buhiri tiina jisnina mûsa. 11 “Pairo namono mehne ñano yoena tjiga” ni, mûsare dutiriro Cohamacuta jira. “Masare wajãena tjiga”, niriro tirota jira Cohamacu. Pairo namono mehne ñano yoerapanahta masunore wajãna Cohamacu to dutiare yũhdũrucaina jira mûsa. 12 Cristo marine tuaro cahño, marine dutira marine yũhdũchu yoaro taro. To dutiare mari yoarire, mari yoerari cũhure ñũno marine besero tarohca. To ã besehtina jina to dutiare noano yoajihna. Å yoa to cahmano sehetu durucujihna mari. 13 Mipũre painare mari pja ñũerachu Cohamacu sehe masare to beseri pja jichu marine pja ñũsi. Wiho mejeta painare mari pja ñũchu Cohamacu sehe pja ñũno, marine buhiri dahresi.

Cristore wacũ tuaina sehe noaare yoara

14 Yu coyea tũhoga mûsa. “Cristore wacũ tuaja yũhu”, cũiro to nipachuta painare to noano yoadoherachu to ã nimari cjiri sehe ne yaba cjihti jierara. Tõ sehe ni wacũ tuamacanocarirore Cohamacu yũhdũchu yoasi. 15-16 ¿Jesu yairo, Jesu yacoro ñaa suhti dihta ti cjuachu ñũna ti chũhti mariachu ñũna dohse yoajari mûsa tinare paye baro cjuaina jina? “Noano jiga mûsa. Å yoana noano suhti tiga. Å jina noano chũa mehne yapi wahcãga”, nipanahta ti cahmaare mûsa waerachu mûsa ã nimari cjiri ne yaba cjihti jierara. 17 Å yoa “Cristore wacũ tuaja”, mûsa nipachuta noaare mûsa yoerachu Cristore mûsa wacũ tuaa ne yaba cjihti jierara.

18 Mûsa mehne macariro ahri yu buherire tũho duaeraro õ sehe masijaro. Noaare yoeraparota “Cristore wacũ tuaja”,

niboca tiro. Noaare yoeraro Cristore to wacũ tuaare painare masichũ yoa masierara. Noaare yoariro pinihta noaare to yoa mehne Cristore to wacũ tuaare masichũ yoa masina. 19 “Cohamacũ cũirota jira”, ni tũhotura mũsa. Mũsa ã ni tũhotuchũ noa nina. ã jipachũta tó purota Cohamacũre yũhtiro marieno tirore mũsa masichũ tí yaba cjihti jierara. Watĩa cũhũ mũsa tũhoturo seheta tũhotura. ã yoa Cohamacũ to jia tiare masina tina. ã masia, cuia, teterera. 20 Cũiro noano yoeraparota “Cristore wacũ tuaja”, ni tũhoturiro jiro tũho masierariro jira. Cristore wacũ tuamariro painare noano yoeraro potocãta Cristore wacũ tuaerara. Õ sehe ni yahuihtja mũsare ahrire: 21 Abrahã mari ñũchũ cjiro to macũno Isaa wama tiri cjirore wajãbasaa tiri jimare Cohamacũre. ã yoaro tirore tãa mehne ti yoari tuhu bui duhu payoa tiri jimare. ã duhu payoro Cohamacũ to dutiriro seheta to macũnore wajãno taro nia tiri jimare Cohamacũre ño payoro taro. To ã yoachũ ñũno potocãta Cohamacũre to wacũ tuarire masia tiri jire Cohamacũ. To ã wacũ tuariro to jichũ masino, “Potocãta noariro jira”, ni ñũa tiri jire Cohamacũ tirore. 22 To ã ni ñũchũ ahrire masina mũsa: Abrahã Cohamacũre wacũ tuaro tirore yũhtia tiri jire. ã yũhtiro Cohamacũre to wacũ tuarire masichũ yoaro nia tiri jire. 23 ã jiro Cohamacũ yare ti joari pũi to niriro seheta ã waha tiri jire: “Abrahã Cohamacũre wacũ tuaa tiri jire. To ã yoachũ ñũno ‘Noariro jira tiro’, ni ñũa tiri jire Cohamacũ tirore”, ni joaa tiri jire Cohamacũ yare ti joari pũi. To ã ni ñũchũ masia “Abrahã Cohamacũ mehne macariro jira”, nina masa tirore. 24 ã jina ahri yũ yahuitire masina mũsa: “Cohamacũre wacũ tuaja” niriro, to noano yoerachũ ñũno Cohamacũ sehe tirore “Noariro jira”, ni ñũerara. Cohamacũre wacũ tuariro sehere potocãta to noano yoachũ ñũno “Noariro jira”, ni ñũna Cohamacũ tiro sehere. 25 ãta ni ñũa tiri jire Cohamacũ Rahab wama tiricorore mũa mehne ñano yoarucuricoro cjirore. Josué cjiro to warocarinare noano piti boca “Noano sãa tahga”, nia tiri jire ticoro. ã yoaro tina ti tjuaa duachũ ticoro sehe pa maha sehere ñoa tiri jire tinare “Tinare ñũ tuhtiina wajãri”, nino. To ã yoachũ ñũno “Noaricoro jira”, ni ñũa tiri jire Cohamacũ ticorore. 26 ã tjira. Mari pjacũpũre catia mariachũ ji masieraja mari. ã jiro catia marieno mari pjacũ yaba cjihti jierara. Tó seheta “Cohamacũre wacũ tuaja”, nipanahta painare mari

noano yoaerachũ potocã jierara mari wacũ tuaa. Ñ jiro mari noano yoaa mariachũ mari wacũ tuaa yaba cjihti jierara, catia marieni pjacũ to yaba cjihti jieraro seheta.


Mari dũseroi wijaare yahuha

3 ¹ Cohamacũ yare masare buheina to yare ti noano yoaerachũ ñũno tina pinihtare masare buheraina yũdoro Cohamacũ buhiri dahrerohca. Tíre masina mũsa, yũ coyea.

Ñ jina mũsa mehne macaina masare buheina payũ jiena tjiga.

² Jipihtina payũ tahari mari ñaare yoaja. Cũiro ñaare durucuerariro Cohamacũ cahmaare noano yoariro jira tiro. Ñ jiro paye ñaa cũhũre yoerara. ³ Õ sehe jira ahri mari piti dahre buhechũ: Cawalo to dũseroi comaa pjĩ to ñahmanore ña dihohti pjĩne mari cũja, tirore mari majarerũcachũ yoana tana.

Ñ yoana tí pjĩ comaa pjĩ mehne tirore to wahahto mari waja majarerũca dapoja. Tí pjĩca mahari pjĩca to jipachũta tí pjĩ mehne tirore wahachũ yoaja mari. (Õ seheta mari dũsero mahanocã to jipachũta tí dũsero mehne pjĩro ñano yoaja mari.) ⁴ Dohoria quitu mehne piti dahre yahu



namoihtja mũsare: Bũsoca pjiria to jipachũta tiare wihnono to tuaro wãrocapachũta oturiro sehe mahari pjĩca mehne tia nohoi to waha duaroi oturocara. ⁵ Tó seheta jira mari dũseroi wijaa. Mari dũsero mahanocã to jipachũta tí dũsero mehne pjĩro yoaja mari. Mahari pichacacã pjĩro to jũ wahcãno seheta mari dũsero mehne pjĩro ñaare yoa masija. ⁶ Ñ jiro mari dũsero pichaca yoaro sehe jira. Mari dũseroi wijaa jipihtia ñaare yoachũ yoara marine. Pichaca to jũ dũcaro seheta mari dũseroi wijaa mehne mari noano jiborirore ñabiaro yoaja mari. Ñaare durucuna watĩno to dutiro seheta mari yoana nija. ⁷ Jipihtinare nũcũ macainare wahiquinare, minichahcare, chihchõ wahcãinare, wahire mari masa sitichũ yoa masija. Mari payũ tina barore masa sitichũ yoa tuhsũja. Ñ jia tina noano tũho

masina. **8** Tinare mari yũhtichũ yoapachũta mari dũsero sehe ñaare durucuro ne tjueraputiara. Ñ jiro nuina ti niji siariro seheta mari dũsero sehe ne niji siaeraputiara. Mari dũseroi wijaa ñabíaa jira. Ñ jiro ñima painare to wajãno seheta marine paina cũhũre ñabiaro wahachũ yoara mari dũseroi wijaa. **9** Mari dũsero mehne Cohamacũ mari pũhtoro mehne mari noano durucuja. Ñ durucupanahta masa Cohamacũ yoaro sehe jiinare to bajuamehnerina ti jipachũta tinare ñabiaro ni durucuja mari. **10** Cũ dũseroihta noaa durucua cũhũ, ñaa durucua cũhũ wijara. Yũ coyey, ã ni durucueraro cahmana. **11** Máca pohtai mũ wiori copai noaa co, ñaa co cũhũ ne wijaerara. **12** Yũ coyey, higuera cũ olivo pocare dicha tierara. Tuhsũ, secũ higuera pocare dicha tierara. Ñ yoa máca pohtai mũ wiori copai moa tia co to wijaachũ moa mariea co wijaerara. (Tó seheta mari dũseroi noaa durucua, ñaa durucua mehne wijaachũ yoeraro cahmana. Ñ ni durucuaeraro cahmana.)

Noano masia waro õ sehe jira

13 Cãina mũsa mehne macaina noano masiina jira. Noano masiina mũsa jia tiare õ sehe yoa ñonahca mũsa. “Paina yũhdoro noano masija sã”, niena tjiga. Ñ nienata noare yoaga mũsa. Ñ noare yoana potocãta noano masiina jira mũsa. **14** Wiho mejeta paio paye barore to cjuachũ ñũna tíre tuaro cahmaina jina, paina mehne suarucuina jina, painare yũhdũrũca duaina jina, “Noano masiina jija sã”, niena tjiga mũsa. Mũsa ã niina jina mahñoina jira mũsa. **15** Ñ yoaina ti tũhotua ne Cohamacũ ya tũhotua jierara. Ti tũhotua Cohamacũre yũhdũrucaina ti ñano tũhotua jira. Tí tũhotua sehe watĩno ya jira. **16** Masa ti cjuare tuaro cahmaina, painare yũhdũrũca duaina ã cahma sayorucura. Ñ yoaina jia jipihtia ñaare yoarucura. **17** Paina sehe Cohamacũ yare noano masiina sehe tina pinihta ã yoamacanocaa nierara. Ñ yoa tina ne cahma sayoerara. Ñ jia masa noaina, painare noano yũhtiina, pja ñũina, masare yoadohoina, masare cũno potori yoaina jira tina. Tíre yoaa, mahñono marieno yoara tina. **18** Ñ yoana cahmachea marieno jina, painare “Cahmachena tjiga”, mari ni yahuna, noaina wahachũ yoana nija mari masare.

**Ahri yahpa macaa ñaare cahmana,
Cohamacure cahmaeraina jira mûsa**

4 ¹ ¿Dohse jiro baro mûsa cahma sayojari? ¿Ã jina dohse jiro baro cahmachejari mûsa? Ñaare goa pjana, cahmache duara mûsa. Noaare yoa duapanahta ñaare yoara mûsa.

² Paye barore mûsa cahmana. Ã cahmana masare wajãna mûsa ti yare nana tana. Pairo paye barore to cjuachu ñuna tíre mûsa tuaro cahmana. Ã cahmapanahta tíre na masierara mûsa. Ã yoa tíre cahma sayorucura mûsa. Cohamacure sinierana, mûsa cahmaare ne bocaerara.

³ Ã yoa sinina, mûsa ya cjihti dihtare sinimana mûsa, mûsa cahmano seheta yoarucuna tana. Paina ya cjihti sehene sini payoerara mûsa. Ã jiro mûsa sinichu Cohamacu mûsa siniare waerara.

⁴ Cohamacure cohãina jira mûsa. Ahri yahpa macaa ñaare cahmana, Cohamacure cahmaeraina jira mûsa. Ahri yahpa macaa ñaare cahmana Cohamacure cahmaeraina ji tuhsura. ¿Tíre masierajari mûsa?

⁵ Õ sehe nia tiri jire Cohamacu yare ti joari pûi: “Cohamacu Espíritu Santore mari mehne jihtirore cûhre. Ã jiro Espíritu Santo sehe marine cahño, ñaare mari tuaro cahmapacheta cahmasãaerara tiro. To manuno to namonore to cahĩ doaro seheta marine tuaro cahña Espíritu Santo”, ni joaa tiri jire panopure. To ã ni joari wiho warota jierara. Potocãta jirota nina.

⁶ Ã yoa Cohamacu marine noano yoadohora tirore mari noano yuhtihto cjihtore. Õ sehe nina Cohamacu yare ti joari pûi: “Yuhu pinihta painare masi yuhdurucaya’ nirirore, Cohamacu ñu tuhtira. Pairo sehene ‘Ñariro, wiho jiriro jija’, niriro sehene Cohamacu yoadohora”, nina to yare ti joari pûi.

⁷ Ã jina Cohamacure noano yuhtiina jiga mûsa. Ã yoa watĩnore yuhtiena tjiga. Mûsa ã yuhtierachu ñuno tiro sehe musare duhti wahcã mûrocaa waharohca.

⁸ Cohamacure noano yuhtiga mûsa. Mûsa ã yoachu tiro sehe musare yoadohorohca. Ñaina jira mûsa. Ã jina ñaare yoa namoena tjiga. Ñaa cûhure cahmana, noaa cûhure cahmana jira mûsa. Ã jina mûsa ñaa tuhhotumarire cohtotaga. Mûsa ã yoachu ñuno Cohamacu mûsa ñaa yoari buhirire cohãnohca.

⁹ Mûsa ñaa yoarire tuaro cahyana, bujua witiga. Ã yoana mûsa ñaare yoari buhirire tiiga. Tíre wahcheina jiena tjiga. Ã jina mûsa ñaa yoarire ñano yajeripohna tiga.

¹⁰ “Ñariro, wiho jiriro jija yuhu”, nina

Cohamacure ño payoga. Mûsa ã yoachû ñño tiro sehe ño payoa mehne noano yoarohca mûsare.

Ti coyeare Jesu yainare ti basi ñano quitu dahre dutieraha

11 Yû coyea Jesu yaina jina, mûsa basi ñano quitu dahrena tjiga. Mûsa coyeirore ñano quitu dahrena, tirore buhiri dahre duti duaina jina nica mûsa. Cristo ya dutia sehe masare buhiri dahrehti dutia ji tuhsûra. ã jina masare ñano quitu dahrena Cristo ya dutiare õ sehe nina nica mûsa: “Marine noano dutierara Cristo ya. ã jina mari mû sũro buhiri dahre dutijihna”, nina nica mûsa masare ñano quitu dahrena. ã nina Cristo ya dutiare ñano ni durucuina tjuara mûsa. ã jina tí dutiare yoaeraina tjuara. 12 Masare dutiare wariro, masare beseriro Cohamacuta jira. Masare pichacapû wahaborinare tirota yûhdûchû yoa masina. ã yoa tirota masare pichacapû cohã masina. ã jina mari sehe masare “Ñaina jira”, ni masieraja. Cohamacû dihta mari coyeare besetiro jira.

Ñamichacapûre dohse mari jiltore masieraja mari

13 Mipûre yûhûre tûhoga mûsa. Õ sehe niina tûhoga yûhûre: “Michare, ñamichacare pa macapû jina wahanahca. Tópûre cû cûhma jina, paye baro dua, nuchûnahca. ã yoana wapatanahca mari”, nina cãina mûsa mehne macaina Cohamacure wacûno marieno. ã niina jina, yûhû sehere tûhoga mûsa. Tó sehe niinare ahrire yahui tai nija: 14 Ñamichacapû dohse mûsa jiltore masierara mûsa. Me ti ji, dói pihti mûano seheta jira mari jia tia. Me mahanocã jiro, pihtia wahara. Tó seheta mari cûhû mahanocã jina, yarianahca. 15 ã jina õ seheta ni tûhoturo cahmana mûsare: “Cohamacû to cahmachû jinahca mari. ã jina õ sehe yoanahca mari”, ni tûhoturo cahmana mûsare. 16 ã jipanahta mipûre “Mari mû sũro õ sehe yoanahca”, nirucumana mûsa Cohamacure wacûno marieno. Tó sehe nirucuna painare yûhdûrucaina jina, ñaare yoara mûsa. 17 ã jina noaare mari yoahire masipanahta tíre yoaerana ñaare yoana nija mari.

Pache pûare yahuha Santiago

5 1 Pache pûa mûsa mipûre tûhoga yûhûre. Baharopûre mûsa ñano yûhdûnahca. ã jina tii sañurucuga mûsa.
2 Mûsa pache ba pihtia wahaahca. ã yoa mûsa suhtire casípoca

cũhũ chũ pahñoahca. ³ Ahri dachorire, pihtiri dacho pano niñerure m̄sa pj̄iro wihbochũ ne tí yaba cjihti jierara. M̄sa ã wihbochũ ñũno niñerure m̄sa cahĩchũ masina Cohamacũ. Tí niñeru to wapo wijiboriro seheta tí niñeru pihtia waharohca. ã Jina niñerure m̄sa cahĩri buhiri ñano yũhdũnahca pichacarpũ m̄sa jũchũ m̄sa pjacũre jũ pjaro seheta. ⁴ M̄sa weserire dahra cohtainare wapaerare m̄sa. Tinare mahñore m̄sa. ã Jiro tinare m̄sa wapaerari niñerure ñũno, m̄sa mahñorire masina Cohamacũ. M̄sare dahra cohtaina wapa na duaa, sañurucura tina. Ti ã ni sañurucuchũ mari pũhtoro Cohamacũ tinare tũhora. ⁵ Ahri yahpapũre payũ pache mehne jia tira m̄sa. ã Jina m̄sa ji coa dihtare yoaa tira m̄sa. ã Jina pjiriro wachũ ti noano nuriro yoaro sehe jira m̄sa. Pjiriro wachũ pj̄iro to chũri baharo tirore ti wajãhti cuhtupũ na wahcãna. Tó seheta m̄sa cũhũre pj̄iro m̄sa cjuari baharo m̄sare to buhiri dahrehtopũ na wahcãnohca Cohamacũ. ⁶ Noainare ñano ti yoerapachũta peresu yoa wajã dutire m̄sa tinare. M̄sa ã yoachũ tina sehe m̄sare yũhdũrũca masierare.

Cristo to tjua tahtore noano cohta dutiha marine Santiago

⁷ ã Jina yũ coyeya, mari pũhtoro Cristo ahri yahpapũre to tjua tahtore noano cohtaga. Wese pũro to toaa dicha tihti pjare noano to cohtaro seheta noano cohtaga. Puhiro to dũcachũ. baharopũ coro to ta namochũ cũhũre to toaapũre “Coro ta sãajaro” nino, to wesere to noano duhtore noano cohtara tiro. ⁸ To ã cohtariro seheta m̄sa cũhũ noano cohtaga. Mari pũhtoro to tjua tahto mahanocã dũhsara. ã Jina Cohamacũre ã wacũ tuarucuna to tahtore ã cohtarucuga m̄sa.

⁹ Yũ coyeya m̄sa basi nurena tjiga Cohamacũ m̄sare to buhiri dahrehta sehe. ã yoa ahrire wacũga m̄sa. Buhiri dahrehtiro to tahto mahanocã dũhsara. ¹⁰ Yũ coyeya, ñano yũhdũpanahta mari pũhtore noano cohtaga Cohamacũ yare yahu mũhtaina cjiri ti yoariro seheta. Tina ti cũno pjariro seheta cũno pjaga m̄sa cũhũ tinare ñũ cũna. ¹¹ ã yoa ahri yũ yahuhtire wacũga m̄sa. Ñano yũhdũpahta Cohamacũre duhueraina wahcheina jira. Panopũ macarirore Job wama tirore cjirore tũhore m̄sa. Tiro ñano yũhdũparota Cohamacũre duhuerari jire. ã Jiro to ñano yũhdũri baharo Cohamacũ tirore noano yoari jire. Cohamacũ mari pũhtoro noano pja ñũriro jiro ãta yoari jire tiro. Tí jipilhtiare masina m̄sa.

12 Yũ coyea ahrire noano tũhoga tjoa. Õ sehe ni wama payora masa: “Mũano macariro mehne potocã nina nija”, nina masare tũho dutia. Tuhsũ, “Ahri yahpa mehne potocã nina nija”, nina masa. Paye mehne cũhũre wama payora tina. Tina yoaro sehe ã ni wama payoena tjiga. Ahrire mũsare tuaro dutija. Mũsa painare yahuna, noano potota yahuga tinare. Wama payoro marieno ni yahuga tinare. ã mũsa potocã yahuchũ ñũno Cohamacũ soro mũsa niri buhirire buhiri dahresi.

13 Mũsa mehne macariro ñano yũhdũriro jiro, Cohamacũre sinijaro tiro. Pairo wahcheriro jiro Cohamacũre wahchea mehne basajaro. 14 Mũsa dohatina, Jesu yaina pũhtoare pjirocaga mũsa. Mũsa ã pjirocachũ tina sehe mũsare se mehne wisõahca mari pũhtoro Jesu wama mehne to tuaa mehne. ã wisõ tuhsũ, mari pũhtoro Cohamacũre mũsare sini payoahca tina. 15 ã ti sini payochũ “Mari sinino seheta tiro yoarohca”, ti ni tũhotuchũ Cohamacũ mũsare dohatiinare mũsa dohatiare yũhdũchũ yoarohca. ã yoa mũsa ñaa yoari buhiri mũsa dohatiina jichũ ñaa mũsare sini payoahca. Ti ã sini payochũ ñũno mũsa ñaa yoari buhirire borohca Cohamacũ. 16 ã yoa mũsa mehne macaina mehne mũsa ñaa yoarire cahma pũ bũhũseheri yahuga. ã ni tuhsũ, mũsa basi Cohamacũre cahma sini payoga. Mũsa ã sini payochũ mũsa sini payoinare Cohamacũ yũhdũchũ yoarohca. Noare yoaina mũsa jichũ Cohamacũre tuaro mũsa sini payoriro seheta yoarohca tiro. ã jia mũsa sini payoa tua nica. Wiho jia jierara. 17 Cohamacũ yare yahu mũhtariro cjiro Elia wama tiro mari yoaro seheta masũno jia tiri jimare. ã jiro “Coro taero tjijaro” ni, tuaro sinia tiri jire Cohamacũre. To ã ni sinichũ tia cũhma noano pa cũhma dacho macai ahri yahpũre ne coro taera tiri jire. 18 Pari turi tjoa Cohamacũre corore to sinichũ coro taa tiri jire. ã jiro pari turi ahri yahpai yucũri bũcũa, dicha tia tiri jire. (ã jia Cohamacũre mari sinia wiho jia jierara.)

19 Yũ coyea, mũsa mehne macariro Cohamacũ yare duhuriro cjiro Cohamacũ yare pari turi to cahmahto cjihtore tirore yahuna, noano yoana nina mũsa. 20 ã yoa ahrire masiga mũsa: Cohamacũre duhuriro cjirore Cohamacũre pari turi cahmachũ yoana, pichacarpũ wahaborirore yũhdũchũ yoana nica mũsa. ã jiro payũ to ñaa yoari buhirire Cohamacũ bo pahũonohca.